

ՀԱՅ ԿՆՈՉ ՉԱՅՆԸ *)

II

Շատերը աշխատում են հաստատել, թէ կնոջ ոչ—անկախ տնտեսական դրութիւնը մեծ օգուտ է բերում մայրութեանը, որովհետեւ այդ դրութեան մէջ կիներ աւելի մասնագիտօրէն է վերաբերւում գէպի իր կոչումը: Բայց դա սխալ կարծիք է, մայրութիւնը դրանից ոչ մի օգուտ չէ ստանում: Նոյն իսկ չափազանցութիւն չի լինի, եթէ ասենք, թէ այդպիսի դրութիւնը ընդհակառակը վնասում է մայրութեանը, որովհետեւ մեծ մասամբ դրա հետեանքներն են վաղաժամ ծնունդները և երեխաների մահուան թւի ատիճանաբար մեծանալը:

Կար ժամանակ, երբ կիներ գնահատւում էր իր երեխաների քանակով. քանի շատ երեխաներ ունենար կինը, այնքան բարձր էին գնահատւում նրան: Բայց երբ զարգացաւ արդիւնագործութիւնը, և դժուարացան կեանքի պայմանները, հայրը այլևս չէր ուրախանում իր երեխաների թւով: Այդ պատճառով աղքատ դասակարգի մէջ առաջ է եկել սակաւաթիւ երեխաներ ունենալու հակում: Բայց հարուստ կանայք էլ յետ չեն մնում այդ հակումից:

Չ'ունենալով ոչ մի աշխատանք, շատ անգամ նոյն իսկ տնային ոչ մի զբաղմունք, հարուստ կանայք ձգտում են դռնէ արտաքին գեղեցկութեամբ փայլել: Իսկ ճշմարիտ մայր լինել և միևնոյն ժամանակ արտաքին փայլը, գեղեցկութիւնը չը կորցընել, դա գրեթէ անկարելի բան է: Հէնց դրա համար էլ նրանք շատ անգամ աշխատում են ամուսնութեան բնական հետեանքից—մայր լինելուց խոյս տալ: Սակայն այդ միևնոյն շար-

*) Տես Մուրճ № 1:

ժառիթները չեն, որ ստիպում են աղքատ դասակարգի կանանց էլ խոյս տալ երեխայ բերելուց: Ո՛չ, այստեղ մեծ դեր է խաղում չքաւորութիւնը—հացի խնդիրը:

Ի հարկէ՝ թէ հարուստ և թէ չքաւոր ընտանիքներում այդ բանը տեղի չէր ունենայ, եթէ մայրերը կանգնած լինէին իրանց կոչման բարձրութեան վրայ, եթէ ունենային ցանկալի կրթութիւնը, եթէ հասկանային մայրութեան վեհութիւնն ու մեծ պատասխանատուութիւնը:

Ո՛րքան բարեխններ կարող են հասցնել մարդկութեանը կրթուած մայրերը...

Ինչպէս բոլորին յայտնի է, երեխաներն աւելի մօտ են են լինում իրանց մօրը, քան հօրը: Շատ երեխի մարդիկ մինչև իրանց կեանքի վերջը մեծ պատկառանքով ու սիրով են յիշել իրանց մօր անունը:

Պատերազմի դաշտում մեռնող զինուորը յիշում է իր մօրը, ցանկանում է նրան տեսնել: Անառակ որդին իր մօր մօտ է վերադառնում, նրա զգուանքին է ապաւինում: Մայրը իր զաւակներին համար մի տեսակ փարոս է թշուառութեան և տըլութեան ծովում: Նա է երեխաներին սկզբնական կրթութիւն տուողը: Ինչ որ գիտէ, ինչ որ զգում է—այդ բոլորը նա տալիս է իր զաւակներին, ուստի չը պիտի զարմանալ, որ մեր ամենաքնքոյշ ու ամենախոր զգացմունքները «մայր» խօսքի շուրջն են պտտւում:

Հին ժամանակներում երեխաների ամբողջ դաստիարակութիւնը ընկնում էր ծնողների, մասնաւորապէս մօր վրայ: Իսկ այժմ այդպէս չէ, երեխաների դաստիարակութիւնը սկզբում մօր ձեռքին է, իսկ յետոյ անցնում է դպրոցներին, հասարակութեանը:

Հին ժամանակներում մայրութիւնը կատարւում էր որպէս մի բնաղղ, որպէս սեռական յարաբերութեան մի բնական հետեանք. իսկ ներկայումս դրա վրայ աւելացել է նաև դիտակցութիւնը, զարգացած խելքը:

Կենդանական ոչ մի տեսակի ժառանգները այնքան հոգատարութիւն և երկարատև դաստիարակութիւն չեն պահանջում, որքան մարդկային ժառանգները: Ո՞վ պէտք է լինի այդ հոգսը բաշտողը, այդ պահանջը լրացնողը. ի հարկէ՝ մայրը: Ո՛րքան մեծ է նրա դերը: Համեմատենք մօրից զրկուած երեխային մայր ունեցողի հետ: Համեմատենք երկու երեխաների, որոնցից մէկը միայն մօր հոգատարութեան տակ է, իսկ միւսը—ծառանդի ու դաստիարակների և այն ժամանակ կը հասկանանք այն մեծ ոյժը, այն մեծ ազդեցութիւնը, որի անունն է «մայրութեան»:

Թիւնն: Լաւ մայրերը կարող են աշխարհ շինել, իսկ վատերը՝ քանդել:

Արժանի են արդեօք համակրութեան այն մայրերը, որոնք իրանց հանդատութեան ու զուարճութիւնների պատճառով ուրիշի խնամքին են յանձնում հարազատ զաւակներին կամ թողնում են թափառել փողոցներում, հրապարակներում առանց խնամքի ու հսկողութեան: Երբ մենք պատահում ենք մի շատ առողջ և բարոյապէս մաքուր օրիորդի կամ երիտասարդի, այդ բանը իսկոյն և եթ վերագրում ենք հոգատար մօր ջանքերին ու դաստիարակութեանը: Իսկ ով է մեծացնում այն հազարաւոր ստոր, կեղտոտ, փչացած էակներին, որնք կատարեալ չարիք են դառնում հասարակութեան համար:

Երբ մենք խօսում ենք յայտնի մարդկանց մասին, իսկոյն յիշում ենք նրանց մայրերին: Իսկ ով է ծնում ու սնուցանում բազմաթիւ ոճրագործներին, գողերին, աւազակներին: Ի հարկէ մայրերը, դարձեալ մայրերը:

Ինչպէս էլ քննելու լինենք հարցը, կը տեսնենք, որ մայրական կոչումը շատ մեծ դեր է խաղում հասարակական կեանքում:

Բնութիւնը կին արարածին տուել է մի մեծ արտօնութիւն՝ մարդկութեան համար նոր անդամներ ծնելու և մեծացրնելու արտօնութիւնը: Իսկ հասարակութիւնը այդ բանը գիտենալով հանդերձ՝ նրա գործունէութեան առաջ պատնէշներ է բարձրացրել, նրան զրկել է ազատութիւնից, անկախ գրութիւնից, նրան թոյլ չէ տալիս բարձր գիտութեան հետեւելու, իր ոյժերը կատարելագործելու: Ո՞րքան վնասակար է այդպիսի վերաբերմունքը, որքան ամօթալի:

Մեր մայրերը տգէտ են, չեն հասկանում իրանց կոչման բարձրութիւնը: Իսկ ով է մեղաւոր, ով է նրան այդ գրութեան մէջ դնողը: Ի հարկէ՝ այն հասարակութիւնը, որն իր աւանդական սովորութեամբ ստիպում է կնոջը զուրս չը գալ ընտանեկան շրջանից, միշտ տղամարդու հպատակն ու ստրուկը մնալ և չը հետեւի գիտութեան ու հասարակական կեանքի հոտանքին:

Կինն իր բազմակողմանի գործունէութեամբ պիտի մասնակցէ սօցիալական կեանքին, որպէս զի հասկանայ նրա լաւ ու վատ կողմերը, նրա ընթացիկ պահանջները և այդ բոլորի համեմատ սերունդ պատրաստէ, երեխաներ կրթէ ու մեծացնէ:

Այն, իւրաքանչիւր կին դեռ մինչև մայր դառնալը պիտի լաւ ճանաչէ կեանքը և հասկանայ իր բարձր կոչումը: Իսկ մեզանում բոլորովին հակառակն է տեղի ունենում: Մեր օրիորդները կրթւում են այնպիսի պայմաններում, այնպիսի ուղղութեամբ, որ բոլորովին առնչութիւն չ'ունին մայրական պարտա-

կանութիւնները հետ: Նրանք պատրաստուում են, դաստիարակուում են միայն նրա համար, որ գրաւեն հակառակ սեռին, բաւարարութիւն տան նրանց պահանջներին: Արտաքին գեղեցկութիւնը, զարդն ու զարդարանքը նրանց աւելի է գրադեցնում, քան ներքին գեղեցկութիւնը, քան հոգու և սրտի դաստիարակութիւնը:

Նրանք չափ բան են կարդում, չափ բան են սովորում, իսկ մայրութեան մասին—ոչինչ: Մայրական պարտականութիւնների հետ նրանք ծանօթանում են միայն այն ժամանակ, երբ մայր են դառնում, այսինքն երբ երեխայ են ծնում: Այս դրութիւնը կարելի է համեմատել այն տղամարդկանց դրութեան հետ, որոնք իրանց ձեռքն են առել ամբողջ ազգի պաշտպանութիւնը, բայց ոչ մի զէնք չունեն դրա համար: Ի՞նչ կը լինէր այդ ազգի վիճակը, եթէ նրա զինուորները մինչև պատերազմի դաշտ գուրա գալը ոչ մի գաղափար չ'ունենային պատերազմի կամ զինուորական ծառայութեան մասին:

Կանանց կրթութեան ծրագրի մէջ չէ մտնում «մայրութեան» առարկան: Մինչև իսկ ամօթ է համարւում աղջկան ծանօթացնել մայրական ապագայ սուրբ պարտականութիւնները հետ: Լռութեամբ թոյլատրւում է, որ այդ բանը կատարուի այսպէս կոչուած՝ «մայրական սուրբ բնազդով»: Իսկ կեղծ քաղաքավարութիւն, արտաքին փայլ, հաճոյախօսութիւն ու կօկետութիւն—գրանք թոյլատրելի են: Չէ որ այդ միջոցներով կինը կարող է գրաւել տղամարկանց, ուրեմն էլ ինչո՞ւ ուրիշ բաների մասին մտածել: Այսպիսով հասարակութիւնը ստիպում է, որ կինը միայն իւր բնազդի միջոցով հասկանայ մայրական սուրբ պարտականութիւնները: Մայրական բնազդը չափ բարձր և սուրբ զգացմունք է, բայց միայն այն չափով, ինչ չափով բնութեան ամեն մի օրէնք: Զարգացման ստոր աստիճանի վրայ կանգնած վայրենիների և կենդանիների համար բնազդը չափ մեծ դեր է խաղում, իսկ քաղաքակիրթ հասարակութեան համար միթէ ամօթ չէ, որ ստիպում է կնոջը կանգնել այդ միևնոյն աստիճանի վրայ և միմիայն բնազդի թելադրութեամբ կատարել իր պարտականութիւնները:

Կինը մինչև այժմ զրկուած է եղել ազատութիւնից ու լայն գործունէութիւնից, որը զարգացնում է մարդուս միտքը, ուժեղացնում է կամքը և կատարելագործում է ընդունակութիւնները: Նա չափ յետ է մնացել տղամարդուց: Ահա այդպիսով ծնող մարդկութիւնը մեծանում և կրթւում է սղէս ու անխորձ մայրերի ձեռքով:

Իայց ամեն մի մայր՝ լինի նա տգէտ կամ գիտուն, իր

սրտում թաղցրած է լինում մի խոր զգացմունք, որի անունն է «մայրական սէր»:

Մայրական սէր—դա մի անսահման ոյժ է, բայց այդ ոյժը պահանջում է զեկալար, ուղղութիւն տուող: Միայն սէրը երեխային օգուտ չէ կարող բերել, իսկ եթէ այդ սէրը միացած է գիտութեան ու ազատութեան հետ, այն ժամանակ կարող է հրաշքներ գործել:

Կին-մայրը բնազդաբար ցանկութիւն է զգում կրծքով կերակրելու իր երեխային: Շատ մայրեր այդ բանից էլ զրկուած են՝ հիւանդութեան կամ մի այլ պատճառով: Այդ միևնույն բնազդը ստիպում է նրան սիրել իր զաւակներին, իսկ ուրիշ... Ուրիշ ոչինչ: Երբ հարկաւոր է այդ զաւակին, այդ զեռափրթիթ էակին կրթել, կատարեալ մարդ դարձնել, այն ժամանակ անդօր է բնազդը: Այդ տեղ անհրաժեշտ է գիտութիւն ու նախապատրաստութիւն, որոնցից զուրկ է մեր կանանց ամենամեծ մասը... Դրանց համար մայրական պարտականութիւնները կարծես վերջանում են «ծիծ տալով»: Երեխային ծծից կտրեց—ուրեմն մայրական ամենազղիւսւոր պարտականութիւնից ազատուեց: Բայց չէ որ կենդանիներն էլ այդպէս են վարւում: Միթէ մարդը այդ միևնույն աստիճանի վրայ է կանգնած:

Երբ տղամարդը ուզում է մի որևէ արհեստով պարապել, սկզբում նա սովորում է այդ արհեստը: Հակառակ զէպրումնա պարապ կը մնայ, հասարակութիւնը նրան դորձ չի հաւատալ: Իսկ մայրութիւնը... Միթէ հասարակ արհեստից էլ ստոր է, որ հասարակութիւնը նրա համար ոչ մի նախապատրաստութիւն չէ պահանջում մայրերից:

Երեկաների մահացութեան թւի շատութիւնը, նրանց վատառողջութիւնն ու ֆիզիքական—մտաւոր անբաւարար զարգացումը ցոյց են տալիս, որ մեր մայրերը կանգնած չեն իրանց կոչման բարձրութեան վրայ:

Գուցէ ասողներ լինեն, թէ այդ բանում մեղաւորը իրանք կանայք են: Ինչո՞ւ չեն հասկանում իրանց կոչումը, ինչո՞ւ չեն կատարում իրանց պարտականութիւնները... Այո, կանայք էլ են մեղաւոր, բայց ամենամեծ մեղքը տղամարդկանց—ամբողջ հասարակութեան վրայ է ընկնում, որովհետեւ նրանք են այդ դրութիւնը ստեղծողը, նրանք են կանանց ազատութիւնը ճնշողը, նրանց իրաւունքները սահմանափակողը:

Մեր ընտանեկան կեանքը կարօտ է բարեփոխութեան, կարօտ է գիտութեան լոյսի, բայց մենք նրան չըջապատել ենք անթափանցելի քողով, որպէսզի օտարի աչքը ներս չը թափանցէ: «Տունը մարդուս ամբողջն է», ասում է ժողովրդական ա-

աածը, իսկ այդ տան տէրը—տղամարդը ամեն կերպ խոյս է տալիս փոփոխութիւններից:

Մեր մէջ մի տեսակ համոզմունք է կազմուել, թէ մեր ընտանեկան կեանքը շատ լաւ վիճակի մէջ է, թէ նրա գլխաւոր հիմքը կիներն է եղել և պիտի լինի, ուստի կանանց դրութեան փոփոխումը կարող է քանդել այդ տան «օջախը», կարող է աւերել ընտանեկան երջանկութիւնը:

Այդ երևոյթի գլխաւոր պատճառն այն է, որ մենք արդէն վարժուել ենք հին կարգերին. իսկ երբ մարդ գոհ է գոյութիւն ունեցող պայմաններից, այն ժամանակ շատ դժուար է նրան համոզել, թէ նրանք վնասակար են, թէ նրանցից աւելի լաւերը կան: Նոյն իսկ դժգոհ մարդը աւելի շուտ այդ վատ պայմանները անհատական հանգամանքների կը վերադրէ, քան թէ ընդհանուր չարիքի: Շատերը նոյն իսկ չէին էլ ցանկանայ չարիք պատճառող պայմանները փոխել, վախենալով թէ մի գուցէ նորերը հնարից էլ վատթար լինեն:

Ահա այդ հանգամանքները շատ մեծ դեր են խաղում կանանց հարցում: Դրանց ազդեցութեան տակ մենք չենք ուզում հին կարգերը փոխել, նորերը հաստատել, բայց ամենից առաջ մենք աչքի առաջ պիտի ունենանք հետեւեալ տարրական ճշմարտութիւնները:

Մենք ծնւում ենք ոչ միայն ապրելու, այլ և զարգանալու, առաջադիմելու համար: Սովորական կենդանիների են նրման այն մարդիկ, որոնք կարծում են, թէ միայն գոյութիւն պահպանելով և սերունդ առաջացնելով կատարած կը լինեն իրանց մարդկային պարտականութիւնները: Բայց մարդիկ բարձր են կենդանիներից, նրանց կեանքի նպատակն էլ բարձր պիտի լինի, նրանք միշտ պիտի առաջադիմեն:

Առաջադիմութիւն ասելով պէտք է հասկանալ այն ամենը, ինչ որ նպատակ է մարդկային երջանկութեանը թէ անհատական և թէ հասարակական տեսակէտից:

Արդեօք համապատասխանում է մեր ընտանեկան կեանքը իշխել պահանջներին: Ո՛չ: Նա իր ցանցերով ճնշել է կնոջ ազատութիւնը, զրկել է նրան անտեսական անկախ դրութիւնից: Նա ոչնչով չէ աջակցում կնոջ առաջադիմութեանն ու երջանկութեանը: Ուրեմն անհրաժեշտ է բարեփոխութիւն մտցնել՝ կանանց համար տնտեսական անկախ դրութիւն ստեղծելով:

Այդպիսի դրութիւնը անշուշտ բարեփոխութիւն կը մտցնէ ընտանեկան յարաբերութիւնների մէջ. բայց այդ փոփոխութիւնը օգտակար կը լինի, նա չի փոխի ամուսնական յարաբե-

բութիւնները, բացի այն, որ կի՛նն ալիւս ամուսնույ տնտեսական կախում չի ունենայ:

Աստղներ կան, թէ կինը չէ կարող լաւ մայր լինել, եթէ տնտեսական անկախութեան ձգտի, եթէ ամուսնանալուց յետոյ էլ ուզենայ իր սեփական աշխատանքով նիւթական բարիքներ ձեռք բերել: Բայց դա միանգամայն սխալ է: Միթէ կի՛նն իր ամբողջ ժամանակը գործադրում է մայրական պարտականութիւնների համար: Ի հարկէ՝ ոչ: Ուրեմն ի՛նչ միտա, եթէ նա ազատ ժամանակը զբաղուի գեղարուեստով, գրականութեամբ, արդիւնադործութեամբ՝ մի խօսքով մի այնպիսի գործով, որը կարող է նիւթական սրտչապահովութիւն տալ և սըղամարդու իշխանութիւնից ազատել:

Ձը մոռանանք, որ կան մայրեր, որոնք ուղղակի անկարող են իրանց վրայ վերցնել երեխաների հոգատարութիւնն ու դաստիարակութիւնը: Դրա զլխաւոր պատճառները երկու են:

Առաջինը՝ ամեն մի մայր բնութիւնից չունի այն բոլոր ընդունակութիւնները և ոյժը, որոնք անհրաժեշտ են երեխաներին լաւ խնամելու և մեծացնելու համար:

Երկրորդ՝ ամեն մի մայր չէ ունենում իր զաւակներին դաստիարակելու համար անհրաժեշտ գիտութիւնը: Ահա այդ հանգամանքներում մանկական պարտէզները կարող են օգնութեան հասնել:

Այդպիսիների համար փրկարար միջոց են մանկական պարտէզները, որոնք զգալի չափով թեթեացում են մայրական պարտականութիւնները: Այդ հիմնարկութիւնների նպատակն է՝ ցանկալի ուղղութիւն տալ երեխաների բնական հակումներին:

Երեխային այդ բանը երբէք չի մնասի, մայրն էլ ոչինչ չի կորցնի: Ի՞նչ մնաս, եթէ երեխան օրուայ մի մասը անցկացնէ հմուտ ձեռքի հսկողութեան տակ: Ի հարկէ մօր կուրծքը և նրա զգուանքները զարձեալ կը կատարեն իրանց դերը: Իսկ դրանց հետ միասին երեխան օրուայ մի մասը կ'անցկացնէ լուսաւոր ու մեծ սեննակներում, կը խաղայ խոտերի ու ծաղիկների մէջ, կը մեծանայ բնութեան գրկում, բանիմաց դաստիարակների ղեկավարութեամբ: Նա մենակ չի լինի, նրա հետ կը լինեն նաև նրա հասակակից ընկերները: Բոլորին էլ յայտնի է, որ երեխաները սիրում են միայն իրանց հասակակիցների հետ խաղալ, որովհետև միայն այդպիսիների մէջ կարող է հաւասարութիւն թափաւորել: Իսկ ընտանիքի մէջ երեխան չէ կարող այդ տեսակ ընկերներ ունենալ:

Մանկական պարտէզից յետոյ մօր հետ անցկացրած ժամերը աւենանք՝ անիկ, աւենաքազքր ժամերը կը լինեն երեխայի

համար: Օրերն այդ տեսակ կանոնաւոր անցկացնելը երեխայի հոգու մէջ կը դրօշմէ հաւասարութեան և ընդհանուր շահերի գիտակցութիւնը և կը հեռացնէ ամեն մի եսական զգացմունք, որը զարգանում է, երբ նա միակ երեխան է ընտանիքի մէջ, կամ երբ նրան ճնշում են մեծ եղբայրներն ու քոյրերը:

Ամփոփելով մեր վերև ասածները՝ կը դանք այն եղրակացութեան, որ մայրերը կարող են հրաշքներ գործել, հասգին բարիքներ հասցնել մարդկութեանը, եթէ կանգնած լինեն իրանց կոչման բարձրութեան վրայ, եթէ ունենան գիտութիւն ու անտեսական անկախութիւն:

III

Հին դարերից սկսած երկու սեռի մէջ բաժանուած աշխատանքի բնական հետևանքը այն է եղել, որ կնոջը բաժին է բնկել տնային գործունէութիւնը—անտեսութիւնը, իսկ տղամարդուն՝ ամբողջ աշխարհը: Այդպիսով մայրական բարդ պարտականութիւններից յետոյ կնոջ կեանքում մեծ նշանակութիւն ունի տնտեսութիւնը: Մենք տեսանք, որ կանայք հասարակական անապատ պայմանների չնորհիւ չեն նախապատրաստում մայրութեան համար: Այժմ քննենք և տեսնենք, թէ արդեօք ներանք նախապատրաստում են իրանց միւս գլխաւոր պարտականութեան համար:

Մենդառութեան նիւթերը մինչև մարդու բերանը հասնելը՝ շատ անգամ փոխարինութեան սխառմի չնորհիւ երկար ճանապարհորդութիւններ են կատարում, երկրից-երկիր են անցընում: Այդ նիւթերի վերջնական ընտրութիւնն ու մշակումը կնոջ պարտականութիւնն է կազմում: Կինն է նրանցից կերակուր պատրաստողը:

Եթէ այդպէս է, եթէ ուտելիք պատրաստելը միայն կնոջ սեփականութիւնն է կազմում, ապա ուրեմն պէտք է սպասել, որ նա՝ այսպէս ասած՝ խոհարարական գիտութիւնը լաւ սովորած կը լինի: Սակայն իրականութեան մէջ այդպիսի բան չը կայ: Կանանցից շատերը գաղափար անգամ չ'ունեն ուտելիքի մթերքների լաւ ու վատ յատկութիւնների մասին: Նրանց շատ հեշտութեամբ խաբւում են ծախողները՝ լաւի տեղ վատը տալով: Եթէ ամեն մի անտեսութիւն ունենար մասնագիտական հասկացողութիւն, անշուշտ նա կը նկատէր ու կը հասկանար այն բոլոր խարդախութիւնները, որ կատարում են խանութպանները՝ կաթի, սուրճի, մրգեղէնների, մսի և այլ նիւթերի վերաբեր-

մամբ, Դրանք այնպիսի խարդախութիւններ են, որոնք երբեմն մեծանեծ մշտաններ են հասցնում մարդկային առողջութեանը:

Խոհարարութիւնն էլ մի այնպիսի արհեստ է, որ պահանջում է որոշ գիտութիւն և նախապատրաստութիւն:

Ճիշտ է, կինը աշխատում է տան մէջ, կերակուր է պատրաստում, բայց այդ բոլորը նա անում է իր «թագաւորի», իր ամուսնու ճաշակին ու պահանջներին բաւարարութիւն տալու համար: Այդպիսով տղամարդը աւելի երես է առնում, աւելի ազատութիւն է տալիս իր քմահաճոյքներին: Իսկ կինը... նա պէտք է միշտ խոնարհուի և համբերատար լինի, միշտ պիտի հպատակուի տղամարդու կամքին: Չէ որ նրանից է ստանում իր ապրուստի միջոցները, ուրեմն դրա փոխարէն ստիպուած է ստրկական դրութեան մէջ մնալ: Այդպէս են ներկայ կարգերը, այդպէս է նրան հրամայում հասարակութիւնը:

Երբ կինը մի որևէ խոհարարական դպրոց է յաճախում, նա այդ անում է միայն այն նպատակով, որ սովորէ թանկագին կերակուրներ պատրաստել, որպէսզի դուր գալ իր մերձաւորին: Բայց այդ դեռ բաւական չէ: Նա պիտի աշխատէ սովորել այնպիսի բաներ, որոնք կը նպաստեն նրա ընտանիքի առողջութեանը: Օրինակ՝ մթերքների որակը, աննդառութեան աստիճանը և այլն: Առողջ հոգին առողջ մարմնի մէջ կը լինի. իսկ մարմնի առողջութիւնը կախուած է լաւ սնունդից: Ուրեմն դրանից կարելի է եզրակացնել, թէ մարդկութեան համար սրբան մեծ նշանակութիւն ունի կերակուր—սնունդ պատրաստելու հարցը:

Ամենանպատակայարմարն այն կը լինի, որ խոհարարական արհեստը յանձնենք յատուկ մասնագէտներին: Հարկաւոր չէ, որ ամեն կին անպատճառ զբաղուի դրանով: Եթէ նա ընդունակ չէ, նախապատրաստուած չէ—թող իր ոյժերը գործադրէ այլ ասպարէզում, որտեղ որ աւելի օգտակար կարող է լինել: Բայց դրա համար անհրաժեշտ է քանդել նրա ստրկութեան շղթաները, անհրաժեշտ է ազատութիւն ու իրաւունքների հաւասարութիւն տալ:

—Կինը կերակուր չը պատրաստէ !? անշուշտ կը բացազանջն շատերը: Ապա էլ ինչու է հարկաւոր նա, եթէ այդ էլ չ'անէ...

Այո, մինչև այժմ նա միայն կերակուր պատրաստելով է ցոյց տուել իր անտեսական արժէքը, որովհետև գործելու ուրիշ ասպարէզ չէ ունեցել: Տուէք նրան ազատութիւն և այն ժամանակ կը համոզուիք, որ կանայք տղամարդկանցից ոչ պակաս օգտակար կարող են լինել գիտութեան ու հասարակական գործունէութեան բոլոր ասպարէզներում:

Եւ միթէ քիչ փաստեր կան այդ ճշմարտութիւնն ապացուցանելու համար: Թերթեցէք պատմութիւնը և դուք կը տեսնէք, թէ քանի-քանի կանաչք փառքի պատկերն են ստացել իրանց քաջութեան, հայրենասիրութեան, անձնազոռութեան և այլ բարձր յատկութիւնների համար: Միթէ կանաչք չէին Յուդիթը, Եսթերը, Սանգուխար, Շուշանիկը, Օրլէանի կոյսը և ուրիշ շատերը, որոնց անունները գովասանքով են յիշած պատմութեան մէջ: Սակայն թողէք պատմութիւնը և մտէք այժմեան քաղաքակիրթ երկիրները՝ Ամերիկա, Եւրոպա և այն ժամանակ դուք կը տեսնէք, թէ որքան բազմաթիւ կանաչք արդէն դործում են գիտութեան, գրականութեան, գեղարուեստի և այլ ասպարէզներում: Միթէ փոքր է շնորհալի գերասանուհիների, երգչուհիների, կին գրողների, նկարչուհիների և այլ կին գործիչների թիւը:

Այդ բոլոր փաստերը յոյց են տալիս, որ կանաչք բացի մայր ու խոհարարուհի լինելուց՝ կարող են նաև ուրիշ ապարէզներում օգտակար լինել: Բայց՝ ի հարկէ՝ այդ օգտակարութիւնը տեսնելու համար անհրաժեշտ է փոփոխութիւն մտցնել մեր կեանքի մէջ՝ սկսելով ընտանեկան շրջանից: Իրմենք օրինակներին:

Եթէ քաղաքներից մէկում չինենք մի մեծ ու յարմար տուն առանձին-առանձին բնակարաններով և ընդհանուր խոհանոցով, որը բոլոր ընտանիքներին ճաշ կը մատակարարէ իրանց սենեակներում, այդ տան մէջ կարգ ու մաքրութիւն պահպանելու համար ամեն մի ընտանիք կարիք չի ունենայ իր սեփական ծառայողներն ունենալու, այլ կը լինեն ընդհանուր ծառաներ բոլորի համար էլ: Այդպիսի բնակարանների օգուտն այն կը լինէր, որ հնարաւոր կը դառնար ամեն տեսակ յարմարութիւններ ունենալու էժան գնով: Տան կից կը լինէր երեխաների համար ձմերային ու ամառային այգիներ, ցերեկուայ մանկանոց հմուտ զեկավարների հսկողութեան տակ: Ամեն մի դործ կը կատարուէր հմուտ մասնագէտների ձեռքով և ի հարկէ աւելի լաւ, քան թէ այժմեան պայմաններում:

Ինչպէս արդէն ասացինք, ամեն մարդ կարող է պահանջել, որ ճաշը իր բնակարանը բերեն, բայց՝ ի հարկէ՝ ամենից յարմարն է ընդհանուր սեղանատանը ճաշել: Եթէ ընտանիքները կարող են առանց անախորժութիւնների միասին լողանալ, թատրոն ու եկեղեցի յաճախել, երաժշտութիւն լսել, ինչո՞ւ չը պիտի կարողանան միասին ճաշել:

Շատերը կարող են առարկել, թէ զբանով կարող է ընտանիքի կապը քայքայուել: Բայց միթէ ծիծաղելի չէ այդպիսի ա-

աարկութիւնը: Միթէ միասին ճաշելով պիտի ընտանիքի անդամները իրար հետ կապուեն, իրար սիրեն...

Այդպիսի բնակարանները չափազանց օգտակար կարող են լինել մանաւանդ կանանց համար, որովհետեւ աշխատանքի խելացի բաժանումը նրանց հնարաւորութիւն կը տայ աւելի քիչ աշխատել, բայց աւելի շատ օգուտ տալ, աւելի հմտութեամբ կատարել յանձնարարուած գործը:

Ներկայումս քսան ընտանիքներում ամենաքիչը քսան կին աշխատում է ճաշ պատրաստելու համար և՛ չը նայելով դրան, դարձեալ անբաւարար է կատարում այդ գործը, մինչդեռ վերելում յիշուած տան մէջ այդ միևնոյն աշխատանքը կարող են կատարել 4—5 հոգի և աւելի հմուտ կերպով: Այդպիսով ահագին խնայողութիւն է ստացւում:

Տնային պարապմունքներից ազատ մնացած կանայք էլ կարող են գործել ուրիշ ասպարէզներում՝ իրանց գիտութեան և ընդունակութիւնների համեմատ:

Բայց կան կարծողներ, թէ մինչև այժմ կնոջ ձեռքում է եղել անտեսութիւնը՝ կերակուր պատրաստելն ու տան մաքրութեան վրայ հսկելը, սրանից յետոյ էլ այդպէս պիտի շարունակուի:

Զարմանալի է, որ ամենից քիչ գրաւչութիւն ունեցող այս աշխատանքը միմիայն կնոջ պարտականութիւնն է համարւում: Ուրեմն կինը, որ համարւում է գեղեցիկ ու քնքոյշ արարած, սիրելի ամուսին, յարգելի մայր, շարունակ պիտի կատարէ խոհարարուհու և աղայինի պաշտօնը: Միթէ անբնական չէ դա:

Այո, անբնական է, ուստի և անհրաժեշտ է տալ կանանց ազատութիւն ու անտեսական անկախութիւն, որպէսզի նրանք էլ տղամարդկանց նման իրանց ընդունակութիւնների ու ցանկութեան համեմատ ընտրեն այս կամ այն մասնագիտութիւնը և կանոնաւոր կերպով նախապատրաստուեն դրա համար:

Հին ժամանակներում մարդիկ բաւականանում էին գլխաւորապէս ընտանեկան յարաբերութիւններով, բայց երբ հետըզհետէ առաջ եկան նորանոր պահանջներ, երբ հազորդակցութեան շնորհիւ հեշտացաւ առևտուրը և զարգացաւ արդիւնագործութիւնը, այն ժամանակ փոխուեցին նոյնպէս անհատական յարաբերութիւնները, և գոյութիւն ստացաւ «հասարակութիւն» ու հասարակական յարաբերութիւնները:

Շատ ժամանակ չէ, ինչ կանայք որպէս անհատներ մասնակցում են այդ հասարակական յարաբերութիւններին, որ մեր

քաղաքակրթութեան էական պայմանն է կազմում: Դա ոչ թէ բուականութիւն է կամ զուարճալիք, այլ մի անհրաժեշտութիւն:

Կանանց համար էլ՝ որպէս անհատներ՝ պատահել տղամարդկանց կամ կանանց հետ՝ անկախ ընտանեկան յարաբերութիւններից—ներկայումս պահանջ է դառել: Նա՝ որպէս հասարակական պահանջ՝ որոշ չափով ստանում է իր բաւարարութիւնը, բայց նրա կանոնաւոր զարգացմանը արգելք են հանդիսանում մի շարք ընտանեկան ու հասարակական սովորութիւններ, որոնց պատճառները պէտք է որոնել տնտեսական-սեռական յարաբերութիւնների մէջ:

Տղամարդկանցից չատերը դանազան պատճառներով ստիպուած են լինում երկար ժամանակով կամ մշտապէս հեռու ապրել իրանց ազգականներից. իսկ սեփական ընտանիք կազմելու համար նրանք ոչ միջոց են ունենում և ոչ էլ մտածում են: Կանայք էլ հետզհետէ սկսում են առանձին ապրել և մի որոշ ժամանակ անհատական կեանք վարել:

Ձանազան կուրքները, հիւրանոցները և կահաւորած սենեակներն են այդ դասակարգի մարդկանց ապաստարանը: Ներանք անկարող լինելով սեփական յարկ կազմել, որ կապուած է մի շարք դժուարութիւնների հետ, ստիպուած են լինում տանել այդ տեսակ հիմնարկութիւնների առողջապահական ու բարոյական աննպաստ պայմանները:

Մենք պէտք է հիմնենք ամուսնութիւնից բոլորովին անկախ մարդկային բնակարաններ, որտեղ կը կարողանային այդ տեսակ մարդիկ ազատ ու ազահով կեանք վարել: Այդ բանը միայն այն ժամանակ զրուի կը դար, եթէ կանայք էլ տնտեսապէս անկախ դրութիւն ունենային, եթէ նրանց վզին չը փաթթէին միմիայն խոհանոցային ու սնային աշխատանքները: Այդպիսի պայմաններում ամուրիները կարող էին ամուսնանալ, երբ որ ցանկանային, առանց ճնշելու մէկի կամ միւսի տնտեսական դրութիւնը:

Եթէ կանայք համոզուած լինեն, որ իրանց երջանկութիւնը և խաղաղ կեանքը ապահովուած կը լինի նաև չ'ամուսնանալու դէպքում, այն ժամանակ նրանք կը զգան սեփական ոյժերի գիտակցութիւն, չեն ստորացնի իրանց արժանապատուութիւնը, այսինքն կ'ունենան այնպիսի յատկութիւններ, որոնք անհրաժեշտ են ամեն մի մարդ-արարածի առաջադիմութեան համար:

Մենք բոլորովին անտեղի կերպով վախենում ենք, թէ ներկայ ընտանեկան կեանքի բարեփոխութիւնը շատերին հնարաւորութիւն կը տայ ընդ միշտ ամուրի մնալու: Ո՛չ, դա սըխալ կարծիք է: Այդ բարեփոխութիւնը կը մաքրէ ամուսնու-

թիւնը փողոցային—վաճառականական ստոր հաշիւներից և կը գնէ մի այնպիսի հիւրի վրայ, որպիսին է անկաշառ ու անաւատ սէրը, որը չէ ճանաչում ոչ մի հաշիւ բացի գաղափարական ընկերակցութիւնից:

Ներկայ ընտանեկան—տնտեսական պայմաններում մեր ամենօրեայ յարաբերութիւնները մեր ազգականների կամ ծանօթների հետ շատ սահմանափակ են և կրում են նեղ ընտանեկան բնաւորութիւն: Միթէ կարելի է պահանջել, որ ընտանիքի բոլոր անդամները յարգեն միեւնոյն ծանօթին կամ հիւրին, կամ ընդհակառակը—ծանօթը, հիւրը—բոլոր անդամներին: Ի հարկէ՝ ոչ: Բայց որքան անախորժութիւններ են առաջանում այդպիսի պահանջներից:

Ընտանեկան ներկայ կեանքի պայմանները փոփոխելով, այսինքն սեռական հիւրը հասարակականի վերածելով, կարելի է առաջ բերել լայն անհատական ինքնուրոյնութիւն:

Մենք հաշտ աչքով ենք նայում, երբ տղամարդիկ այցելում են կլուբներ և ուրիշ ժողովատեղիներ, նոյն իսկ գովաբանում ենք այդպիսիներին, անուանելով ընկերաաւեր մարդիկ: Բայց ինչո՞ւ ենք դատաւիւտում այն կանանց, որոնք նոյնպիսի ձգտում են ցոյց տալիս, այսինքն ուզում են ընտանեկան յարկից դուրս էլ ժամանակ անցկացնել, ընկերութիւն ունենալ: Միթէ կինն էլ մարդ չէ մարդկային պահանջներով ու ձգտումներով:

Շատերը աշխատում են երեխաներին էլ «տանը պահել», որպէս զի տունը աւելի զբաւիչ դարձնեն, հետեւելով հին նահապետական իդէալին՝ թէ ամբողջ աշխարհը ընտանիքների հաւաքածու է, ուրիշ ոչինչ: Բայց զբանք մոռանում են, թէ անհատներն են, որ կազմում են ընտանիք, հասարակութիւն ու ամբողջ մարդկութիւն, ուրեմն ամենից շատ անհատական ազատութեանը պիտի նպաստել:

Ամեն մի անհատ կարիք է զգում ունենալու իր նմանները, երեխաները մի առանձին հակում են զգում դէպի երեխաները, երիտասարդները—դէպի երիտասարդները, ծերերը—դէպի ծերերը և այլն: Ինչպէս որ անհատը կարիք է զգում սենակութեան, որը նա գտնում է իր «յարկի» տակ, նոյնպէս էլ նա կարիք է զգում մի այնպիսի տեղի, որտեղ կարողանար, գտնել իր նմաններին, իր գաղափարակիցներին: Ուրիշ խօսքով ասած՝ իւրաքանչիւր անհատ հասարակական լայն յարաբերութիւնների պահանջ է զգում:

Տղամարդը ունի հնարաւորութիւն այդ պահանջին բաւարարութիւն տալու, իսկ կինը—ոչ: Հասարակութիւնը նրան բա-

տիրում է փակուած մնալ ընտանեկան յարկի տակ, իր մերձաւորների շրջանում: Ծիշտ է, կանայք էլ կատարում են զանազան այցելութիւններ, հաւաքւում են միասին, պատւում են իրար, հիւրասիրում են քաղցրաւնիքով ու զանազան կերակուրներով, բայց նրանց մէջ չը կայ սերտ կապ, հաստատուն ծանօթութիւն: Ձեականութիւնն ու կեղծ քաղաքավարութիւնն է այդտեղ գլխաւոր դեր խաղացողը: Բարեբախտաբար աւելի քիչ ձեականութիւն կայ տղամարդկանց յարաբերութիւնների մէջ, որովհետեւ նրանք աշխատութեան ժամանակ էլ չփութում են իրար հետ, որովհետեւ նրանց յարաբերութիւնների կապը աւելի բնական է, աւելի պինդ:

Կանանց մէջ էլ կարող է առաջ գալ այդպիսի յարաբերութիւն, եթէ նրանք դուրս գան իրանց փակուած վիճակից, եթէ ամբողջ ընտանեկան կեանքը բարեփոխութեան ենթարկուի:

Երկու սեռի երիտասարդներին թոյլատրւում է որոշ չափով ազատ յարաբերութիւն, բայց բացառապէս սեռական հիմքի վրայ դրուած: Ամեն մի կրթուած երիտասարդ կամ օրիորդ անշուշտ անբաւական կը լինի իրերի այդ տեսակ դրութիւնից: Նրանք կ'ուզենային պահպանել իրանց մէջ բնական յարաբերութիւն, սակայն չեն կարողանում դիմանալ հասարակական ճնշմանը:

Երիտասարդների ու օրիորդների կեղծիքը բացւում է մասնաւոր ամուսնական հարցը վճռելուց յետոյ:

Երբ հարանցուի ընտրութիւնը կատարուած է, էլ ինչու ուշադրութիւն դարձնել միւս օրիորդների վրայ, կամ թէ չէ փեսայի ընտրութիւնից յետոյ էլ ինչու ընդունել միւս երիտասարդների սիրալիութիւնները:

Պարզ է ուրեմն, որ երիտասարդների ու օրիորդների արտաքին-ժամանակաւոր մտերմութիւնը միայն ամուսնանալու միջոց է: Ոչ ոք չէ կարող ենթադրել, որ կիներ ամուսնանալուց յետոյ էլ ջերմ ցանկութիւն կ'ունենայ տեսնուել, բարեկամական յարաբերութիւններ ունենալ ուրիշ տղամարդկանց հետ, կամ տղամարդը-կանանց հետ:

Հասարակութեան «բարձր» կոչուած խաւերում ամուսնութիւնից յետոյ որոշ չափով թոյլատրւում է երկու սեռի մէջ ազատ հասարակական յարաբերութիւն, սակայն այստեղ էլ ձեականութիւնն է մեծ դեր խաղում:

Շատ անգամ պատահում է, որ ամուսնութիւնից առաջ գոյութիւն ունեցող մտերմութիւնը անհետանում է մարդու և կնոջ մէջ, չնորհիւ ընտանեկան-տնտեսական յարաբերութիւնների: Նրանք այնքան խորն են թաղւում նիւթական հաշիւնե-

րի մէջ, որ ժամանակ չեն ունենում առաջուայ նման մտերիմ լինելը։ Այդ բոլորը խանգարում են տղամարդու և կնոջ աւելի բարձր և մաքուր յարաբերութիւնը։

Տղամարդը համոզուած է, որ իր յաջողութիւնը կանանց շրջանում կախում ունի իր քսակից-փողից, և նա ահագին ծախսեր է անում կնոջ քմահաճոյքները կատարելու համար։ Այդ բոլորի գլխաւոր պատճառը կնոջ ոչ անկախ տնտեսական դրութիւնն է։ Ուրեմն վերջ դնելով այդ դրութեանը, կարելի է նաև այդ չարիքը վերացնել։

Շնորհիւ զանազան մասնագիտական պարապմունքների՝ կնոջ մէջ կըսկսէ զարգանալ անհատականութիւնը, որը և կը թեթևացնէ կնոջ ու տղամարդու տնտեսական-սեռական յարաբերութիւնը—ճնշումը։

IV

Ուշի ուշով նայենք մեր չուրջը և այն ժամանակ կը տեսնենք, որ ցանկալի աշխատանքն արդէն սկսուել է։

Ազատել ամբողջ մարդկութեան կէսը—իգական սեռը անբնական կերպով առաջացած պայմաններից, տալ նրան միջոց զարգացնելու իր ոյժերը, ստեղծել նոր պայմաններ, որոնք կը փոխէին մարդկային յարաբերութիւնները, կը զարգացնէին հասարակութեան ամբողջ կազմը—ահա սա է այն մեծ աշխատանքի նշանաբանը, ահա զբան է ձգտում կանանց շարժումը։

Այդ շարժումը սկսուած է քաղաքակիրթ երկրներում և մեծ արդիւնքներ է տալիս։ Մեզանում էլ նշմարում են նրա նշոյլները, հարկաւոր է միայն զարգացնել նրանց և զարկ տալ ցանկալի հոսանքին։

1870 թ. Միացեալ-Նահանգներում միայն 412 նկարիչ ու քանդակագործ կանայք կային, իսկ այժմ—19,810։ Կին-փաստաբանների թիւը միայն 5-էր, իսկ այժմ—308։ Պետական ծառայութեան մէջ գործող օրիորդների թիւը 415-էր, իսկ այժմ—15,000։

Անգլիայում և Վալդէստեմ ծառայող կանանց թիւը եղել է *).

	1861 թ.	1891 թ.	
Գրասենեակներում	408	17,859	կին.
Քաղաքացիական պաշտօններում	1931	8,546	—
Լուսանկարչուհիներ	168	2,469	—
Տպարաններում	419	4527	—

*) «Handbuch der Frauenbevegung» s. 267—268.

Դեղատներում	388	1,340	—
Գրավաճառանոցներում	952	2,240	—

Ի հարկէ այդ բոլորը դեռ իրաւունք չեն տալիս պնդելու, թէ կանայք գերադանցում են տղամարդկանց, կամ նրանց հետ հաւասարուել են Կարելի է միայն այսքանն ասել, որ ժամանակակից կիներ շատ բաներում տարբերում է հին ժամանակուայ կնոջից:

Ներկայումս կրթուած կիներ բացի «կանացիութիւնից», բացի ֆիզիկական գեղեցկութիւնից, ունի նաև անհատական որոշ ձգտումներ: Նա այլ ևս չէ բաւականանում միայն «ապրելով», նա ուզում է նաև «գործել»:

Դարաւոր ստրկութիւնը դրել է իր դրոշմը կանանց վերայ, նրանց անշարժութիւնը, փակուած կեանքը և ուրիշից ապրուստի սիջոց ստանալու տենչը կաշկանդել են նրանց ոյժերը, ամուր պատնէշ են բարձրացրել ազատ գործունէութեան առաջ: Բայց քաղաքակիրթ երկրներում տնտեսական ու բարոյական պահանջները վերջապէս քանդեցին այդ պատնէշը և գործելաշխատել ստիպեցին կնոջ:

Շատերն աշխատում են միմիայն կարիքից դրդուած, շատերին էլ, ի հարկէ, միայն կարիքը չէ, որ ստիպում է գործունէութեան ասպարէզը մտնել, այլ գիտակցութիւնը, անկախ դրութիւն ստեղծելու ցանկութիւնը:

Միթէ քիչ կան այնպիսի օրիորդներ ու տիկիներ, որոնք միշտ ձգտում են դէպի տնտեսական անկախութիւն, որոնք զբաղւում են վերաբերում հօրից կամ ամուսնուց փող խնդրելուն:

Առաջ կիներ շատ մեծ դեր էր կատարում տանը իբրև աշխատաւոր, բայց մեքենաների զարգացումը, որի հետեանքն էր տնային արդիւնագործութեան ոչնչացումը, ժամանակաւորապէս զրկեց նրան տնտեսական գործօն լինելուց: Սակայն այդպիսի դրութիւնը երկար չը տևեց: Կիներ մեքենաների յետևից մտաւ գործարանները և նորից կապուեց տնտեսական կեանքի հետ:

Այժմ շատ դժուար է ցոյց տալ մի այնպիսի արդիւնաբերական ձեւը, որի մէջ կիներ մասնակցութիւն չ'ունենար: Բանւորուհի-կանանց թիւը հասնում է Միացեալ Նահանգներում 3 միլիոնի: Անգլիայում բանւորների թիւը եղել է *):

	Տղամարդ	Կին:
1871 թ. 11,593,466, որից	8,270,186	և 3,323,270
1881 11,187,564	7,783,646	3,403,918
1891 12,898,484	8,883,254	4,016,230

*) «Die Frau» s. 205.

Միայն 1,600,000 զործարաններում ներկայումս աշխատում են մօտ 140,000 բանտարուհիներ:

Առաջ ընտանիքի կին անդամները շատ սերտ կերպով էին կապուած միմիանց հետ. նրանք հաւաքուած էին միասին, կարում էին, աշխատում էին, զրուցում էին, շատ անգամ էլ նրանցից մեծը զիւր էր կարգում՝ իսկ ջանէլները լսում ու աշխատում էին:

Իսկ այժմ շատ դժուար է գտնել մի այնպիսի զբաղմունք կամ մի այնպիսի ընթերցանութիւն, որ կարողանար բոլոր անդամներին էլ բաւականութիւն պատճառել:

Միևնոյն ընտանիքի անդամները չունեն ասի սերտ-նեղ յարաբերութիւնը, ինչ որ առաջ: Այժմ հատարակութիւնը ազդում է առեն մի շանհատի վրայ, և ամեն մէկն էլ ուզում է ազատ կերպով իր պահանջներին բաւարարութիւն տալ: Այդպիսով զարգանում է անհատական ազատութիւնն ու ինքնուրոյնութիւնը:

Կանանց մէջ այս փոփոխութիւնն աւելի նկատելի է, որովհետև նրանք աւելի շատ են ենթարկուած ընտանեկան նեղ կեանքի ազդեցութեանը:

Շատ կանայք, ցանկանում են ոչ միայն սեփական փող ունենալ, այլ և սեփական աշխատանք: Բայց կան մարդիկ, որոնք հակառակ են կանանց ինքնուրոյն աշխատանքին, որոնք ասում են, թէ կանայք չը պէտք է մրցեն տղամարդկանց հետ, չը պէտք է մաքառեն նիւթական կեանքի ուժեղ հոսանքի դէմ:

Այդպիսիները մոռանում են, որ աշխատանքը միայն ապրուստի միջոց չէ: Մոռանում են, որ աշխատանքը ազնւացնում է մարդու և զարգացնում է մարմինն ու հոգին: Երբ կինը չփութում է իրական կեանքի հետ, երբ ձեռք է բերում սեփական աշխատանք, այն ժամանակ նա «սեռական էսկիզ» դառնում է իսկական մարդ:

Շատերն էլ աշխատում են համոզել, թէ կինը իր վրայ վերցնելով մարդկային ընդհանուր պարտականութիւնների մի մասը, կը կորցնէ իր գրաւչութիւնը, իր կանացիութիւնը:

Ի հարկէ, եթէ կարելի լինէր հաստատել, որ աշխատող կանանց դէմքը ծածկւում է մօրութեով, որ նրանց կազմուածքն ու ոսկորները կերպարանափոխւում են, որ նրանք սկսում են բասով (կոկորդով) խօսել և այլն, այն ժամանակ տեղիք կը լինէր երկիւղ կրելու: Բայց փաստերը ցոյց են տալիս, որ կինը աշխատութեան մէջ էլ միևնոյն կինն է մնում: Տարբերութիւնը միայն այն է, որ վերջինս աւելի փորձուած, աւելի խելացի է

դառնում և իր աշխատանքի շնորհիւ տնտեսական անկախութիւն է ձեռք բերում:

Կանանց հետաքրքրութիւնը դէպի հասարակական շահերը սկզբում ծաղրով ընդունուեց. իսկ այժմ այդպէս չէ քաղաքակիրթ երկրներում: Օրինակ, Ամերիկայում զօռուար է գտնել մի կին, որ չը մասնակցէ մի որեւէ հասարակական գործում:

Կանանց ձգտումը՝ կազմակերպել ընկերութիւններ, այս դարի հասարակական ամենանշանաւոր երևոյթներից մէկը պիտի համարել:

Նրանց հիմնած արդիւնագործական, կրթական, կրօնական, ազգասիրական և այլ կազմակերպութիւնները ներկայանում են անհրաժեշտ տարր, մի զօրեղ ոյժ հասարակական գործունէութեան համար:

Այդ կազմակերպութիւնների մեծութեան մասին գաղափար կազմելու համար բաւական է աչքի առաջ ունենալ հետևեալ պերճախօս փաստերը.

Գերմանուհիների „Der Bund deutscher Frauenvereine» անունով *) դաշնակցութիւնն ունի 137 մասնաճիւղեր և 70,000 անդամներ: Նրա նպատակն է՝ միացնել այն բոլոր ընկերութիւնները, որոնք այս կամ այն ձևով աշխատում են բարձրացնել կանանց վիճակը՝ տնտեսական, բարոյական, իրաւաբանական և հասարակական բոլոր առպարէզներում: Չափազանց զգալի, չափազանց ակններև են այդ հսկայական կազմակերպութեան բարիքները գերմանացի կանանց համար: Նոյնանման խոշոր կազմակերպութիւններ կան նաև ուրիշ քաղաքակիրթ երկրներում: Ամերիկայում, Անգլիայում, Ֆրանսիայում, Բելգիայում, Շվեյցարիայում, Դանիայում և այլն: Իսկ մեզանում դեռ բազմաթիւ աստղներ կան, թէ կինը միայն ընտանիքի բաժինն է, թէ նա չը պիտի մասնակցէ հասարակական գործունէութեանը, չը պիտի ձգտէ դէպի անկախ աշխատանք:

Բայց չէ՞ որ կանայք ծնւում են, որպէս հասարակութեան անդամներ և ապրում են այդ միեւնոյն հասարակութեան մէջ: Ուրեմն ինչու հետու պիտի մնան նրա կեանքից, նրա պահանջներից ու գործերից: Չէ՞ որ կանայք էլ մարդ արարածներ են, ուրեմն ինչու չը պէտք է աշխատեն իրանց զրութիւնը բարւոքել, իրանց համար անկախ զրութիւն ստեղծել:

Կար ժամանակ, երբ կանանց համար մատչելի միակ հիմնարկութիւնը կուսանոցն էր: Կրօնական կազմակերպութիւ-

*) Helene Lange und Gertreid Bäumer: «Nandbuch der Frauenbewegung» I Teil s. 147..

նը միակ ապաստարանն էր ամուսնական կեանքից փախչող կանանց համար: Նրանք այնտեղ սովորում էին աշխատել ընդհանուրի համար, օգնել մերձաւորին, աղքատին, գգուել անտէր որբին, ձեռք մեկնել ընկածին, մխիթարել թշուառին և այլն և այլն: Ներկայումս էլ գոյութիւն ունեն կուսանոցներ, բայց նրանց կշտին գոյութիւն են ստացել նաև կանացի ուրիշ կազմակերպութիւններ՝ աւելի կենսունակ, աւելի գործունեայ ու արդիւնաւէտ:

Այժմ քաղաքակիրթ երկիրներում կանանց առաջ բաց են ելիք ոչ բոլոր, գոնէ շատ ասպարէզներ:

Իբրև ազադայց վերցնե՛ք Գերմանիան *), այդտեղ տղամարդկանց հետ համահաւասար չափով ու իրաւունքով գործում են նաև կանայք աղքատախնամ և որբախնամ ընկերութիւնների մէջ: Այսպէս օրինակ 1902 թ. սկզբում որբերի խնամող կանանց թիւը հասնում էր.

Բերլինում	488-ի
Հանովերում	80-ի
Մանհայմում	75-ի
Կօլմարում	47-ի
Բօննում	80-ի
Բրեմենում	48-ի և այլն:

Տնտեսական պայմանները հետզհետէ բաղմանում են աշխատանք որոնող մարդկանց թիւը: Կանայք էլ զգալի տոկոս են կազմում այդ թւի մէջ: Ահա հէնց այդ պատճառով նրանք սեփական ջանքերով հիմնել են բազմաթիւ ընկերութիւններ, որոնց նպատակն է՝ օգնութեան հասնել անգործներին:

Այդ ընկերութիւնների օգտակարութեան մասին գաղափար կազմելու համար բաւական է յիշել այն փաստը, որ միայն Բերլինի ընկերութիւնը 1900 թ. ընթացքում 3593 կանանց համար գործ-պաշտօն է գտել: Նոյնքան մեծ է եղել այդ օգնութիւնը նաև միւս քաղաքներում:

Կանանց գործունէութիւնը աւելի մեծ է կրթական ասպարէզում: Տարէցտարի աւելանում է վարժուհիների թիւը, բազմանում են կրթական գործին նպաստող կանանց ընկերութիւնները: Անցեալ 1901 թ. այդպիսի ընկերութիւնների թիւը հասնում էր 57-ի:

Չափազանց ուժեղ հոսանք են սկսել բանուորուհիները: Դրանք ամեն կերպ աշխատում են յետ չը մնալ իրանց բախ-

*) Else Lüders: «Stand der deutschen Frauenbewegung im Beginn des Jahres 1902».

տակիրցներից-բանուորներից, ուստի և օրէցօր բազմացնում են կազմակերպութիւնների թիւը, հաւատացած լինելով որ միայն հաւաքական ոյժերով կարելի է պաշտպանել ընդհանուր շահերը և հասնել ցանկալի հետեանքի: Կազմակերպուած բանուորուհիների թիւը հասնում էր.

1898 թ.	13,481-ի
1899	19,280-ի
1900	22,844-ի

Բանտային կեանքն էլ չէ վրիպել կանանց աչքից: Նրանք ուղեցել են այդ ասպարէզում էլ գցել իրանց լուծման, ուստի և եռանդուն ջանքերով ձեռք են բերել մի քանի իրաւունքներ: Ներկայումս գերմանական բանտերից շատերում կան բանտապետի օգնականուհիներ, բանտային վերակացուհիներ և այլ կին ծառայողներ:

Բացի այդ բոլորից՝ Գերմանիայի բազմաթիւ քաղաքներում կանայք հիմնել են յատուկ ընկերութիւններ, որոնց նպատակն է՝ մաքառել անբարոյականութեան-պոռնկութեան գէմ, օգնութիւն ու պաշտպանութիւն ցոյց տալով բախտից հալածուած, նիւթական կարիքների տակ ճնշուած կանանց:

Վերջին ժամանակներս բարձրագոյն կրթութիւնն էլ առանձնապէս դրաւում է գերմանացի կանանց: Նրանց առաջ միանգամայն բաց են տարրական ու միջնակարգ դպրոցները, բայց այդքանը բաւական չըհամարելով, նրանք ուզում են բարձրագոյն դպրոցներում էլ ազատ մուտք ունենալ տղամարդկանց հետ համահաւասար: Թէև դեռ շատ տեղերում խէթ աչքով են նայում այդ ձգտման վրայ, թէև դեռ շատ դպրոցների դռներ փակ են կանանց առաջ, բայց այնուամենայնիւ գերմանացի ուսանողուհիների քանակը այժմ բաւական մեծ թիւ է կազմում: Այսպէս օրինակ միայն համալսարանական ուսանողուհիների թիւը եղել է 1902 տարեշրջանում.

Բերլինում	611
Բօննում	105
Հալէում	89
Բրեսլաւում	76
Լայպցիգում	73
Փրայբերգում	53
Վիւրցբուրգում	41
Կեօնիգսբուրգում	38
Ստրասբուրգում	33
Հայդելբերգում	33
Գեօթինգենում	32

Միւնիսենում	29
Կեօդնում	19
Հեսսենում	18
Րօստոկում	7
Մարբուրգում	6
Էրլանգենում	4
Գրայֆսվալդում	2
Տիւրինգենում	2

Ընդամենը 1270 ուսանողուհի:

Բացի զրանից եղել են ուսանողուհիներ նաև մի քանի մասնագիտական բարձրագոյն դպրոցներում:

Այդ բոլորի վրայ աւելացնենք և այն փաստը, որ բաղմաթիւ գերմանուհիներ շնորհալի կերպով գործում են գաղարուեստի, գրականութեան ու գիտութեան ասպարէզներում, այն ժամանակ պատկերը կը լրանայ: Որքան խրատական փաստեր է պարունակում այդ պատկերը հայ կանանցս համար...

V

Հասարակութեան աչքում կնոջ բարոյականութիւնը նրա գոյութեան, նրա «լինել-չը լինելու» հիմքն է համարւում: Վայ այն կնոջը, որի բարոյականութիւնն արատաւորուած է: Բայց ինչից է կախուած բարոյականութիւնը: Միթէ նա մի այնպիսի բարեմասնութիւն է, որի վրայ ազդում է գերբնական ոյժը: Ո՛չ: Եթէ ուշի-ուշով քննելու լինենք մեզ շրջապատող կեանքը, այն ժամանակ կը տեսնենք, որ բարոյականութեան հիմքն էլ տընտեսական պայմաններն են: Այս կամ այն անհատի, այս կամ այն ժողովրդի վարմունքը միշտ կախուած է նրա կենցաղից, նրա գոյութեան պայմաններից:

Որսորդական-ռազմական շրջանում ամենալաւ զինւորն ու որսորդը միևնոյն ժամանակ ամենալաւ մարդն էր համարւում, որովհետև այդ հատութիւնից էր կախուած մարդու կենցաղավարութիւնը:

Երկրագործական շրջանում համբերութիւնն ու աշխատասիրութիւնն էր բարձր գնահատւում, որովհետև միայն այդ յատկութիւնների շնորհիւ երկրագործը կարող էր սերմանել ու հնձել:

Իսկ երբ առաջ եկան վաճառականութիւնն ու արհեստները, երբ տնտեսական կեանքը հետզհետէ զարգանալով հասաւ ներկայ բարձր աստիճանին, այն ժամանակ բարոյականութեան

վրայ ունեցած հայեցակէտն էլ փոխուեց: Բարոյականութեան մասնիկներն էլ բազմացան ու բարդացան:

Ուրեմն թէ անհատական և թէ հասարակական բարոյականութեան ղեկավարը չընկալած պայմաններն են: Փոխեցէք այդ պայմանները—կը փոխուի նաև բարոյականութիւնը: Կանաչը շատ անգամ անբարոյականութեան գիրկն են ընկնում—պոռնիկ են դառնում: Բայց փոխեցէք նրանց դաստիարակութիւնն ու չընկալած սօցիալական պայմանները, տուէք արնատեսական անկախութիւն, և այն ժամանակ այլևս պոռնիկութիւն չի լինի:

Կինը—կուսինձոր է, կինը—շարիքների աղբիւր է, կինը թոյլ արարած է, ասում են շատերը. և այդ կարծիքը երբեմն ճիշտ է դուրս գալիս: Բայց ո՞վ է մեղաւորը: Ինքը—կինը: Ո՛չ, Տիրող տնտեսական սեռական կարգերն են այդ ամենի բուն պատճառը:

Մենք կնոջ մէջ խեղդել ենք առաջադիմութեան ու զարգացման համար անհրաժեշտ ձգտումները և դրա փոխարէն նրա սրտում դրել ենք կեղծիք ու շողոքորթութեան սերմեր: Մեղաւոր է դրանում կինը: Ո՛չ:

Մենք մեր կարգերով, մեր դաստիարակութեան սիստեմով տղամարդուն դարձրել ենք անվախ, համարձակ, ազատ, հաստատակամ, իսկ կնոջը—վախկոտ, կասկածոտ, ստորուկ ու թուլակամ: Այդ բանում մեղաւոր է կինը: Ո՛չ:

Մենք գովասանքի ու յանդիմանութեան, պարգևի ու պատժի օրէնքների ու սովորութիւնների միջոցով տղամարդու մէջ զարգացրել ենք հասարակական մի շարք օգտակար յատկութիւններ, իսկ կնոջ մէջ ընդհակառակը—ճնշել ենք: Այդ բոլորից յետոյ իրաւունք ունենք մեղադրելու կնոջը, թէ նա յետ է մնացել տղամարդուց, թէ շատ բաներում տարբերում է նրանից: Ի հարկէ ո՛չ:

Մենք ամեն կերպ ճնշել ենք կնոջ ազատութիւնը, խեղդել ենք նրա ինքնուրոյնութիւնը, բայց միևնոյն ժամանակ գանգատում ենք, թէ նա տղամարդու հետ հաւասար չափով չէ կարող գործել, ցանկալի արդիւնքի չէ կարող հասնել: Միթէ անտրամաբանօրէն չէ դա:

Երբ մէկը ծագայ է մտնում մէկ ուրիշի մօտ—նա որոշ չափով կորչում է իր ինքնուրոյնութիւնը, որովհետև իր կամքն ու ժամանակը կարող է գործածել միայն տիրող կամքի թելադրութեամբ: Այդպիսի պայմաններում որոշ չափով թուլանում է նրա կամքը, սահմանափակում է ազատ մտածողութիւնը: Ուրիշ խօսքով ասած՝ նրա մէջ զարգանում են ստրկական հակումները:

Այդ միևնույնը կարելի է ասել նաև կանանց վերաբերմամբ, միայն աւելի խիստ չափով: Նրանք այդպիսի ստրկական պայմաններում են եղել ոչ թէ ամիսների ու տարիների, այլ ամբողջ դարերի ընթացքում: Կանայք միշտ տղամարդկանց իշխանութեան տակ են եղել, նրանց սահմանած օրէնքներին ու կարգերին են հպատակուել, նրանց պահանջների ու քմահաճոյքների թելադրութեամբ են շարժուել, որովհետև այդպէս են ստիպել տնտեսական—սեռական յարաբերութիւնները:

Այս, կինը մի քանի խնդիրներում յետ է մնացել տղամարդուց, բայց այդտեղ մեղաւորը տնտեսական պայմաններն են: Դրէք տղամարդուն էլ միևնույն պայմանների մէջ,—և հետևանքը նոյնը կը լինի:

Վերևում մենք տեսանք, թէ կինը որքան մեծ դեր կարող է խաղալ իբրև մայր, իբրև հասարակութեան ու ընտանիքի անդամ, եթէ նա ունենայ իրաւունքներ:

Սակայն այդ իրաւունքները ձեռք բերելու համար նա ամենից առաջ տնտեսական անկախութեան պիտի ձգտէ, տնտեսական պայմանները փոխել պիտի աշխատէ: Այդ է պահանջում բնական օրէնքը, այդ է անհրաժեշտ երկու սեռերի ներդաշնակ երջանկութեան համար:

Կանայք, եթէ ուզում էք ջախջախել ձեր դարաւոր ստորկութեան չղթան, եթէ ուզում էք կանգնել ձեր կոչման բարձրութեան վրայ՝ լինել ազատ մարդ ու ազնիւ մայր—աշխատեցէք, սովորեցէք սեփական քրտինքով ապրուստ ձեռք բերել:

Աշխատեցէք, որովհետև միայն աշխատանքն է ազնուացնում մարդու մարմինն ու հոգին, միայն նա է ձեր փրկութեան, ձեր ազատութեան ու բարօրութեան իսկական հիւրը:

Աշխատեցէք:

Տիկին ՀՐԱՆՈՅԵ